

Melitza Geerman, ken tabata fungi como director di Serlimar, a entrega su retiro



Ayera a traves di un comunicado di prensa di gobierno, a bira publico e noticia cu Melitza Geerman ayera 19 di september a entrega su retiro como director di e compania Serlimar.

Den un carta publica riba Viral297, Geerman ta sigura cu despues cu el a asumi e funcion aki na november di 2022, “cu hopi orguyo y satisfaccion mi ta wak back den e logronan significante, manera entre otro: Sali for di Surseance door di un areglo di pago cu Servicio di Impuesto y companianan cu Serlimar tabata debe, esnan cu a haci nan maximo esfuerso pa logra cursonan pa por ta miho den nan trabou, varios reunion cu

a tuma luga den grupo chikito y grandi, cu a habri porta pa dialogo riba diferente topico di importancia pa personal, pago di periodiek y bevordering, na dump a y ta haciendo ainda trabounan pa sana e tereno. Mi ta hiba cu mi e bon recuperdonan di cada un di boso, specialmente di tur cu tabatin un impacto positivo durante mi tempo na Serlimar y alabes mi ta gradici boso pa esaki. Semper keda duna y muestra e miho boso mes,” e carta tabata indica.

Na comienso di aña, minister Arends a señala cu Serlimar a cumpli cu su trahadonan cu pa añanan tabata den espera pa Serlimar y Gobierno di Aruba cumpli cu nan retraso den



pago di bevordering, periodiek y overtime.

Por a recorda cu dia 22 di october 2022, mediante un comunicado di prensa minister Arends a anuncia cu Raad van Toezicht di Serlimar SG a nombra Sra. Melitza Geerman como e director di Serlimar entrante 1 di november 2022.


Den e tempo ey, Serlimar tabata den su momentonan crucial, cu retonan hopi grandi y alabes posibilidadnan real pa cambia e rumbo unda e patrimonio di Aruba tabata bayendo.

Despues di a pasa un proceso

di solicitud e escogencia di e Raad van Toezicht a keda den Sra. Geerman. Sra. Geerman tin un Bachelor's Degree den Business Administration, un Minor degree den Human Resources Management & Organization Development, y Economics. Alabes e tin trayectoria amplio den sector priva, unda e la fungi den diferente funcion clave tanto den management y marketing. Tambe el a traha como Head of Commercial/ Territory Manager Aruba na Superior Tobacco Aruba N.V. afilia na Philip Morris International.

Ayera, despues cu e carta di

Geerman a bira conoci, minister Arends a reacciona riba su rednan social indicando cu “Mi a wordo informa door di Raad van Toezicht di Serlimar ayera den oranan di atardi cu e directora di Serlimar a tuma su retiro. Mi ta lamenta cu e compania ta haya su mes den un situacion asina na e momentonan anki. Mi a urgi RvT pa mantene e continuidad di e servicicionan di Serlimar. Mi tin tur confiansa cu RvT lo cuminsa e proceso dentro di poco pa apunta un director nobo. Mi ta gradici Sra. Melitza Geerman pa su cooperacion y trabounan desplega y ta desea Sra. Melitza tur clase di exito.”



Na comienso di siman un persona a reporta un caso lamentable di maltrato di cacho riba rednan social. Tabata trata di un persona cu tabata maltrata cachonan den su bisindario, e tabata dal nan cu un palo cu tabatin clabo na dje. Esaki a hala atencion di e personanan indica cu a brinda ayudo na e cachonan.

Reportera di Bon Dia Aruba a tuma contacto cu Jacqueline Boderie, ken ta conoci



pa yuda bestianan cu ta den necesidad, bestianan riba caya, pa puntra tocante e situacion di e cachonan en cuestion, si a logra capturanan pa yuda nan.

Boderie a indica cu el a logra bay cu un di e cachonan cu a wordo maltrata. Su situacion no tabata bon y ta na veterinario na unda e lo ricibi un tratamiento di cinco dia, cual el a remarca ta costa hopi placa. E cacho a ricibi golpi na cara y na su bariga tambe.

Keto bay ta denuncia casonan di maltrato y abandono di bestia riba rednan social

Despues cu e cacho termina su tratamiento, el a sigui splica, no sa unda ta bay pone e cacho y mirando e situacion, Boderie a indica, e cacho mas cu claro no por bay back unda e tabata pasobra eyan el a wordo maltrata. No ta conoci ken ta e persona cu a maltrata e cachonan.

Casonan di maltrato di cacho regularmente ta wordo denuncia riba rednan social. E aña aki tabatin varios caso di maltrato di cacho cu a causa conmocion den comunidad, entre otro e caso di e cacho Khaleesi, cu lamentablemente a fayece pa motibo di e maltrato cu el a ricibi di su doño.

Esaki ta un caso cu a bay te corte y cu a termina cu e

doño di e cacho condena na sirbi varios ora di servicio comunitario pa e maltrato cu el a causa na e cacho.

Otro caso cu tambe a hala atencion di comunidad tabata di e cacho Snowy, cu tambe a wordo maltrata y a fayece. Den e caso aki lamentablemente no a bira conoci ken e persona cu a maltrata e cacho tabata ni tampoco a wordo condena.

Lamentablemente, casonan asina tin hopi, pero esaki no ta haci'e aceptable. Ley ta existi y cu colaboracion di KPA, ta bay sigui reenforza esaki pa asina comunidad di Aruba por cuminsa realisa cu abuso di animal no ta bay sin castigo.

Abandono y maltrato ta bay

contra ley di cacho. Ta importante pa comunidad en general cuminsa actua den esaki, pa ta doñonan mas responsable y cuida mascotanan cu tambe ta sinti y ta sufri.

E pregunta ta surgi, ta cuanto biaha mas mester sigui haya casonan di abuso di bestia di e magnitud aki? E tema di cacho y pushi riba caya ta sigui keda un problema sin precedente y comunidad henter mester bira mas consciente di esaki.

Fundacionnan cu ta yuda cachonan cu ta wordo maltrata ta yen caba, y aunke nan ta dispuesto pa brinda ayudo unda cu nan por, e tema di espacio of unda pa pone e cachonan ta birando un problema riba su mes.